

Fasnacht 2016

D'Schnaps bagge

An dr Gaugin-Usstellig z'Madrid, isch dr Guy Morin – aigentlig e Nätte,
dr Königin «underdressed» mit Gsundhaitsschueh entgegeträtte.

Do sait d'Letizia zum Zeremoniemaischter: «D'Stadt Basel isch in Not,
gänd no em Empfang däm Clochard e Täller Suppe und e Stiggli Brot»!

D'Bedytig vo'mene Vorname uuse z'finde isch nit schwer,
so haisst Verena «die Schüchterne» und Gertrud haisst «der Speer».
Es haisst Felix «der Glückliche» und jetzt loss ych e Bömbli platze,
Wie mir schwer vermuete - haisst Baschi: «Wöschwyyb mit Glatze».

Mini Kollege finde's komisch, mini Familie – und ych aigentlig au
Jedes Mool, wenn e Bundesroot d'Olma ereffnet, strichlet är e Sau.
Im letschte Herbscht dr Schneider-Ammann und dä hett's preschtiert,
will sich sunscht in der Regel jo kai Sau für ihn interessiert.

Nordkorea fiehrt e neu Zytzone yy und stellt d'Uhre e halb Stund zrug,
wenn ich so eppis g'heer, denn kumm ych perseenlig grad unter Drugg.
Wenn mir d'Frau «so Sache» ins Ohr flischeret, wird ich rot und röter
und wünsch mir amme seenligscht, es wär scho e halb Stund später.

Mit hän's letschte Herbscht schmärzlig miesse zer Kenntnis näh,
dr «Uhu National» hett dr Ruggdritt us em Bundesroot gäh.
Sie tuet sich uss dr Politigg zrugzieh und will viel neus entdegge
und denn will sie wieder meh Zyt ha, zem ihri Änggel verschregge.

Letschthi mach ych e Velotyyrli dur d'Stadt – juhui, da'sch glatt
pletzlig wird's mit yybel, ych muess fascht kerble und wird ganz matt.
Bevor ych ab em Velo kipp, bin ych mir doch no im glaare,
ych bi woorschynts e weeneli z'lang hinter eme VW nochegfahre.

Dass es im Hansli sim Lääbe nit rund lauft, isch ihm glaub nonig glaar.
jetzt isch är sächzähni und goht immer no in die vierti Primar,
är hett zem Lehrer gmaint – wo dä will, as är ändlig Gutzi git:
«Hey, blyb cool Alte – kennsch Lehrplan 21 – ych ha no finf Joor Zyt».

Dr M. Hirscher, Schirennfahrer – in Eeschtryych kennt dä jedes Kind,
däm gheyt – während eme Slalom – fascht e Drohne uff e Grind.
Jesses – was do hätt kenne passiere... – das isch e Skandal.
Guet – wenn dr Hirscher e Zircher wär, wär das vellig egal.

Vor dr Wiehnacht bi au ych im Gschängglikauf-Rusch gfange
In de Lääde stosch denn vor em Zaahle in ere Rieseschlange.
Ych ha yberlegt, wie ych mi sell duurekämpfe dur die Masse,
ha «Allahu Akbar» gschraue - drno bin ych dr Erscht gsi an dr Kasse.

Syt Neujoohr derfe d'Texaner offe am Gürtel e Waffe draage
Bi dääne zirkuliert jetzt s'Testosteron, zwischem Hirni und em Graage.
Mir isch wurscht, was die mache – ganz Texas ka vo mir uss spinne,
Ych draag mini Waffe nie am Gürtel – die blybt in de Hoose inne.

Wottsch au by uns bänggle?

Uff www.vsg-basel.ch erfahrsch meh!

Drugg: Amerbach'sche Druckerei, Muttenz



Fasnacht 2016

Mir Bäffzgi sinn zwai glatti Hind
ych bi s'Wybli und ych bi ihre Frind
dr Schnitzelbangg singe dien mer vergässe
s'gitt nur dr Bangg denn s'Schnitzel isch gfrässe
und deerfe do singe me hett's i's versproche
mer hänn drum jetz s'FIFA-Syndrom und dr Baizer grad bestoche.

Dä Gnushti Walti Beller stoht mit dr Irina
vor eme Schönheits-Salon und sie will deert iina
si sait zu ihrem Walti gimmer 200 Stutz
und du wartisch in dr Baiz und nimmsch e Kaffi Lutz
denn wird si aber hässig und verruggt iiber dä
är hett ere drum statt 200 grad e Tausger gä.

Iberall wird gspart, au ych spar bim singe
und wird jetz mini Värs als Zwaizyler bringe.

Also mir mien spaare und spaare bi uns Dehaim
drum hänn mr vier Helge gmolt uff aim.

Dä jung Pinguin im Zolli hänn Olaf lo taufe
aber härziger wär Minu gsi will er so watschlet bim laufe.

Das Theater wäg de Edelwyss isch mir iiberdrüssig
ych ha d'Änzian sowiso lieber aber flüssig.

Also bim VW hänn aim friehner scho verseggelt und glegt
und hänn bim Käfer dr Motor statt vorne hinde versteegt.

Ihr miend uns jetz nid an Kaare faahre
denn mir hänn au am Helge miesse d'Farbe spaare.

Nach em Lifting bim Costa Cordalis, isch s'Gsicht nit scheener,
eher schlimmer
denn d'Hutt spannt ihn und bim Absitze lacht er immer.

Wenn d'Frau Merkel au Gränze dicht miecht, mir wurde se loobe
das gäb e Joorhundert-Fasnacht ohni Schwoobe.

Z'Basel wird umbaut und umbaut das wird Wohnige gäh
Umbau-Umbau tä-tä-rää.

Während dr Heuschnuppe-Zyt diens immer die Poolle erwähne
aber was isch denn mit de Tscheche de Serbe und Rumäne.

No mee so Poller während dr Fasnacht das wär e Säge
denn s'heisst jo immer, es gäb z'vill Waggiswäge.

Also wenn'd als Hund in de Ferie im Hundeheim bisch
mergsch gly weeles e Gentl-Dog und weeles e Seyhund isch.

Kürzlig hett mi ain ganz wehrlos überfalle und aabe ghaggt
denn y ha statt dr Pfäffer-Spray s'Aromat yypaggt.

Do hetts gheisse, vom Glepfer wurdisch gräbsgrangg lyyde
und s'näggscht Mol heisst denn, vom After Eight griegsch
Hämoriide.

S'Stüramt tuet uns Bäffzgi ständig blooge
und droot uns mit Zwinger – mer haige d'Hundestür hinterzooge.

Dä mit'ere armlängi Abstand zu de Manne find y gail
probier das emol im Gschtung vom Achtertram nach Weil.

www.bäffzgi.ch

Wottsch au by uns bänggle?

Uff www.vsg-basel.ch erfahrsch meh!

Drugg: Amerbach'sche Druckerei, Muttenz





Luuszäpfe 2016

Dr Badmaischter im Fraueli, das isch jetzt e Maa
doch d'Kopfduechwyber regt das uff, die wänn das gar nit ha.
So diend doch nit so kompliziert, es wurd e Leesig gää:
Dä Job soll doch, als Kompromiss, dr Minu iibernää!

Vor 200 Joor dänggt s'Wallis: Wänn mir Schwyzer syy?
Nach Raclette und – vyy! – Wysswy heisst's denn: «Doch mir sinn drby!»
s hänn alli gstuunt, s het jede dänggt, die kemme sicher nit:
wär will scho am ne Land bidrätte, wenn's dert Ziircher git?

D'Schwoobe-Auto stingge alli, isch jetzt uusekoo
Sie hänn drum bi de Abgaas bschisse, das isch halt esoo.
Uns het die Gschicht nit iiberrascht, das isch doch nit speziell
Uns stingge doch die kaibe Schwoobe aifach generell.

Bi uns im Gschäft wänn si näggscht Joor wider umstruggturiere.
Und bi dääre Gläagehait dr Laischtigslohn yfyiere.
Uns steert das nit, mir finde's guet, und hoffe das wird glinge:
d' Biezer griege rächti Leen und d'Chefe miesste bringe.

«Ich muess ab jetz mee Saggäld ha!» isch gescht mi Glaine koo.
«Du griegsch doch gnueg», han ich em gsait: «erklär emol wiesoo».
«Das isch doch klar,» maint är sofort und sait mit breitem Grinse:
«Mi Sparsäuli git ab sofort negativi Zinse!»

und e baar Joor speeter, deent's denn esoo...:

«Ich muess ab jetz mee Saggäld ha!» isch gescht mi Junge koo.
«Du griegsch doch gnueg», han ich em gsait: «erklär emol wiesoo».
«Du kunnsch nit druss,» erklärt är mir – und wird richtig muff:
«Die baar Frangge länge gopferdeggel nit für's Puff!»

Z Basel heersch bald nur no – «Hochdeutsch» –, das isch gar nit scheen.
Zum Gligg hänn mir jetzt uusegfunde, wie mir das umgeen:
jede Samschtig faare mir uff Lörrach, kaufe'n yy
und kenne deerte – waisch wie glatt – ganz unter Bebbi syy.

Ich lauf duur d'Stadt und iiberall geesch Lyt ganz wyss aazooge.
Hemli, Hoose und au d'Schueh, was do lauft muesch nit frooge.
Begaischteret sag ich zer Frau: «White dinner» isch genial!»
He nai, geesch nit: Das isch e Straik vom Pfläägepersonal.

«Wir schaffen das!» sait d'Merkel nur zur Asylantefluet.
Sie waiss scho, was sie macht, ihri Art isch aifach guet:
Sie bietet allne Kaffi a, mit Gutzi zwaierlai,
wenn die si gseen verschregge sie, und wänn grad wider hai.

S' Basler Krematorium wird jetzt neu baut, noo-dis-noo.
Drum wirdsch, wenn d'Päch hesch, jetzt in Ziiri duure Ofe gloo.
Umgekehrt wär's e Brobleem, das merggt me denne gly:
In unsri Öfe griegsch e Ziircher Schnuure gar nit dry.


Wottsch au by uns bänggle?

Uff www.vsg-basel.ch erfahrsch meh!

Drugg: Amerbach'sche Druckerei, Muttenz



Fasnacht 2016



Nachtschwärmer

Patrouille Suisse an dr Tattoo Dernière

Grund gnueg für paar zem sich beschweere

Die Tiger sind halt schono lut, do gwaggle aim denn d'Oore

Immerhin, do sind mir froh, händ's kaini VW-Motoore

D'Merkelsait: «das schaffen wir»

Si nämme ain, vo ebbe vier

Die andere wandere zu de andere, die makeschobitz Drugg

Und dr aint, wo deertebllybt, dä schigge si denn zrug

Händ d'Innerstadt miesse vier Mol umrunde

Und denn ändlig e freie Parkplatz gfunde

Denn händ mir d'Pargguur gfierteret, nur drey Stund, hämmer dänggt

Und zfriede feschtgestellt dass es jeedem no für ei Bierli länggt

Migrante klaage, als wie meer

Schwizer wärde, isch düür und schweer

Neuerdings, ischs'nüm so düür, s'goot schnäll, Ihr wäädets gsee

Goosch an Schalter, froogsch ganz lieb, griegsch e Swisspass vo dr SBB

In de neue Drämmli, s'isch e Witz

Hets so bleedi holzigi Sitz

Dr Voordail isch, goo taine kaputt, oder wird gar gstoole

Miends numme grad uf Prattele, in d'Ikea e neue go hoole

Dr Donald Trump, e geile Siech

Verzellt, was äär am liebschte miech

Jeede soll e Waffe draage, wenn's goot, e Granate drzue

Und spiil täär gnueg lang mit däm Züüg, händ mir vor ihm glii Rueh

E Couvert mit paar Millione Fragge

Git ain em andere, und dä sait dangge

Das Couvert het zwar niemer gää, und s'hets au kaine griegt

Und drotzdäm isch das Couvert schuld, dass dr Blatter fliegt

Uf em Spaalebärg händs Poller montiert

Mit dääne wird dr Verkeer reguliert

Miend si verschwinde, druggsch e Knopf, wartisch e Sekunde oder zwai

Anders isch es bim Guy Morin, äär verschwindet von'elai

Die ainte finde rächts grad rächt

Die andere finde's eher schlächt

D'SVP het vorwärts gmacht, die wisse halt wie's lauft

Die händ dr Seppli Blatter gfrogt, wie me Stimme kauft


Wottsch au by uns bänggle?

Uff www.vsg-basel.ch erfahrsch meh!

Drugg: Amerbach'sche Druckerei, Muttenz



Fasnacht 2016



KINSCHTLER

syt 2002

Ych kauf mer e Bämssel aifach so zem Descht,
und e Kiibel Farb natyyrlig wasserfescht.
Mit em Auto in d Stadt, das muess sich loone,
do mool ych mir e aigeni wyssi Zoone.

D le Pen fascht oobe, dr Hollande unde,
em glai «Sarkozy..ge» d Händ halt bunde.
In vier Joor lauft s bi uns au rund,
well vo de Blochers d Magdalena kunt!

Zu jedem Kinschtler gheert e staarggi Frau,
so ne Schattegwäggs ha ych jo au.
Anderscht umme duet s dr Christoph mache,
bi ihm isch s dr Brunner Toni, nit sy Drache.

D Ziircher schysst s jetz ganz bees a,
he jo, dr hegschti Duurm dien mir jetz ha.
Nur no heecher, s isch nit zem fasse,
sin Baslerprämie vo dr Granggekasse

Seppli Blatter blaa blaa blaa
so food das FIFA Märli aa.
Fir d Nochfolg mecht äär sälber luege,
s brucht jetz e Maa kai bsunders guete.
Ilusteri Gselle steen zer Waal,
mit syne Maidligschichte dr Karl Daal.
Dr Putin miesst unbedingt mit ins Boot,
suscht sinn bald alli Regime-Kritiger» doot!
Dr Somm dä vo däm Baasler Blatt,
hänn bald scho alli Baasler satt.
Ych wünschti mir är miech do s Renne,
sunscht wurd me ihn als «Böög» verbrenne.
Dr Höness kennt sich scho uss im Gnascht,
S hoggt dr Kaiser Franz uff em aagsäagte Ascht.
Dr Zinédine Zidane weiss sich z weere,
s wird s dr Ronaldo vo ihm au no leere.
S griegt dr Blatter vom vyyle dugge,
langsam e richtig grumme Rugge.
Mir Kinschtler saage s gheert mit an Disch,
dr Möörgeli, wo weiss was aagschmiert isch!

Wo ych im Ateliee mool e scheeni Wolgge,
gits uff mym Schuurz e bar farbigi Dolgge.
Wie länger ych mool wirts umso struuber,
im Verglych zum Putin isch myy Veschte no suuber!

D NZZ kunt ganz nei uff e Disch,
schaad, dass die Zytig nit us Baasel isch.
E Veränderig bi dr BAZ das gieng rugg zugg,
schigget aifach dr Somm nach Ziiri zugg.

Ych kumm rief ych dr Frau jetz wart,
pack s Moolzyyg yy und gang an d ART.
Im Drämmli isch aini blutt mit scheenem Buuse,
do nimm ych dr Bämssel sofort uuse.

Was Grieche gmacht hänn bruucht e Ranze,
dr EU so uff dr Nase umme z danze.
Ganz gnau glyych nur ooni Verstand,
macht das mit uns dr Kanton Baaselland!

Ych ha als Kinschtler unverhoole,
welle d Widmer-Schlumpf bim Abgang moole!
Ych ha s miesse vo myne Pendänze nää!
well soone Bääse ka kai nätt Helge gää!

Wottsch au by uns bänggle?

Uff www.vsg-basel.ch erfahrsch meh!



Alperöösl



2016

Die Hitz im Summer, het no rentiert
d Kie hänn grad Pascht-Milch broduziert
d Hiehner hesch könne schüttle, eichfach so
und s`Rierei isch hinde uuse koo

Im Saustall häämir jetz e Sau
heisst Christof, isch nit bsunders schlau
sit de Waale, s'isch zum verregge
hoggt äär im Stall im rächte Egge

I haa graad welle e Güllefass leere
doo kunnt so äine, wott mi bekeere
verzellt, das äär vo Scientology kuunt
macht nüt, han i gsait, Hauptsach gesund

An dr Tattoo-Dernière, das isch glatt
fliegt Patrouille-Suisse zwäi Moll üüber d'Stadt
nach em zwäite Moll, sind'si wider verschwunde
si hän, wie die mäischte, käi Phaarggblatz gfunde

Bi uns dehäim, im Buurehoof
verdrääiti Wält, miir findes doof
im Kuestall hämmer, kann i verroote
groossi Brobleem mit dr Männerquote

In Baasel händ Bsetzer e Huus könne bstetze
dangg em Dürr, ooni Gsetz z'verletze
är ka nüt drfüür, betoont dr Dürr
i glaub, är ka wiirgglig nüt drfüür

Mir sind ins Kiino, mir zwäi Kie
go dr Schälle-Ursli yyne zie
dä Ursli isch guet, und au e hälle
und het voor allem e groossi Schälle

Bisch mol uf em Mischstogg glande
und bis zum Hals im Misch in gstande
wäär so dieff im Schissdrägg stoot
weis wie's em FC Züüri goot

In de noie Drämmli vo dr BVB
die holzige Sitz, doo griegsch Ruggeweh
unseri Löösig isch dr Hit
miir nääme unsere Mälchstuel mit

Mi Draggtoor isch uff de Fingge
raucht, qualmt und duet stingge
das dä Draggtoor wieder lauft
ha`n i e neue Motor bi VW kauft

Wottsch au by uns bänggle?

Uff www.vsg-basel.ch erfahrsch meh!



Fasnacht 2016

Blagèèr!



e VSG Bangg

Herr Doggter ich bi e akute Fall
Mues ins MRI – und bruch e Ultraschall
Mache sie schnäll sunscht bini e tote Maa
Ha e Wurschtsalat mit Klöpfer kaa

Si kemme us Syrie uss Italie oder Spanie
Us Ungarn, Marokko oder Mauretanie
Kemme si uss dr Schwitz, de kasch si vergaässe
Kai Mensch will settigi Ärdbeeri ässe

Uff de Wahlplakaat seesch numme alti Grätti
Kaini junge Meitli wie ichs gärn hätti
Doch aini lacht ab em Plakat jung und edel
Jetzt schriib ich fünfmol Fielmann uf e Zeedel

Ob z'Basel, ob z'Züri und schintz äü z'Rio
Au der letschti Quatsch isch nur no Bio
S git Bio Glaider und Bio-Chemie
Und s schlimmscht wär vom Morää e Bio-Graphie

S Bedestha Buschi-Fänschter – find ich guet
Wo me hilflosi Buscheli versorge duet
Drum wär ich jetzt ganz stargg derfür
Me bringt dene gli dr Baschi Dürr

Am Boode hets so Streife für die Blinde
Dass d Regierigrööt Roothus besser finde
Jetzt hätte sis gfunde, das wär jo guet
Nur wysse sie nonig wie me regiere duet

Dene arme Schlugger z'Liestel oobe
Hett Basel 80 Millione gschoobe
Dr Beppi dänggt ich stand im Schilf
Derbi isch das Entwiggligshilf

Dr näggscht Värs dä isch viel glatter
E Bombevärs yber Platini und Blatter
Jetzt isch hyte vo dr FIFA e Couvert koo
Drum löhn mir dä Värs und Helge stoo

Gege die Abgaswolgge muess me ebbis due
Kaufsch e Eleggtroauti denn hesch dini Rue
Nur dr Niggi Näggi fahrt VW Diesel GTI
So hett är dr Schmutzli immer derbi

Wenn dr Alt nimmi mag und du hättisch Luscht
So musch eppis mache gege dr Fruscht
Findisch e Callboy z tüür oder doof
Kauf es Billett an Kölner Hauptbahnhof

Wottsch au by uns bänggle?
Uff www.vsg-basel.ch erfahrsch meh!



Fasnacht 2016



Mir zwai – mir sinn zwai Pfadi-Buebe und sinn allzeit bereit
Und mir vollbringe alli Daag e gueti Tat – zu zweit
E Abgasskandal hän mir zwai kha – in unserem VW Kaare
Dr Omega hett i däm Kaare – e grausame Furz lo faare

S'Skikader vo de Männer isch – e ganz e druurig Huffe
Die müen also jede Daag – literwiis Ovi suffice
Mir hän versuecht – däne z'hälfe – und k'hofft s'wär besser gloffe
Doch leider hän mir dr Marcel Hirscher – mit dr Drohne nid richtig troffe

Im Färnsee han i öbbis gluegt – sone Neandertalersändig
Die sin drum scho gschorbe – also nümm lebändig
E Forscher hett – jetz usegfunde – s'Resultat überrascht uns nid
Das es schyyns vo de Neandertaler – in Ziri no ganz vyyl gitt

Wäg em Bahnstreik im Dütsche isch ain gstorbe – das isch wirgligg doof
Diräggt näb de Gleis zwüsche Weil – und Badische Bahnhof
Sälbschmord hett dä – welle mache – isch näb em Gleis umeglungeret
Und will denn nie e Zuug isch koo – isch dä deert verhungeret

D'Schleuse in Birsfælde obe – die sueche e neue Maa
Dä sött halt scho e bitz – mit so Schleuse Erfaarig haa
Dr richtig Maa dä bin ych – hett dr Ali von hinde geusst
Är hett scho vo Afrika – e Schiffli nach Europa gschleust

Wo d'Sibel Arslan s'erschi mol – mit em Zug nach Bärn isch gfaare
isch ihre in Bärn am Bahnhof – öbbis luschtigs wiederfaare
E Hälfer hett ihre z'ässe gää – und mit Deggene zuedeggt
Denn hett d'Bolitsey si regischdriert – und in e IKEA-Hyysli gsteggt

S'neu Auti vom Blatter Sepp isch e VW – ganz e wysse
S'basst zwar nid zu sinere Weschte – aber beidi düen halt bschysse
Dr räscht vo dr FIFA – schafft jetz neu – im Theater jo s'isch woor
Si singe Verdi's Nabucco deert – alli im Gfangnekoor

Mir wüsse öbbis wo d'BaZ nid weiss – nenn si uns nid Ketzler
Dr Baschi Dürr isch nämligg – sälber au e Hüüslibsetzer
Mir sin fascht sicher – dass dr Baschi – das jede Morge schätzt
und nach Kaffi; Zigarette – sälber au so e Schiss-Huus bsetzt

Ziri brucht e neue Name – und zwar ein mit Rasse
Sommerau – hän mir uns dänggt – würd prima zur Stadt basse
E Namenswäggsel – isch ächt bömig und – au no richtig schlau
Denn Ziri isch im Winter scheisse – und im Sommer au

Benimm-Regeln für Flüchtlinge wurde im Dütsche niedergschriebe
Mir finde das für Basel auch gar nicht so übertriebe:

Sie müssen wissen das sie Frauen – mit Respäggt behandeln sollen
Usser vielleicht Frau Heggli-Spiess – mit dääre können sie machen
was sie wollen

Affen, Makaken und Paviane tut es bi uns jo auch nit gee
Die brüllenden Primaten us em Wald sind Mitglieder von der SVPe

Wenn si Drogen nämmen – so vielleicht – ein Jointli oder zwei
Dann gehen sie an Rhy hinunter – deert kiffen sie nid elai

Hier herrscht Religionsfreiheit – man darf sagen was man will
Aber sagen sie dr Larve jo nicht Maske, das wär eidüttig z'viel

Sprichwörter sind – sinnvoll – und au sinnbildligg zu seh'n
Ansonsten haben sie mit «Riss di am Rieme» öffentlich ein Problem

Wenn sie nicht schwimmen, gumpen sie – nicht in Rhein – s'wär gschüider
Sonst sehen wir sie zwei Tage später – in Kembs unten wieder

Und wens ihnen in Basel nicht gfallt denn gitts e anderi Wahl
Göhn si doch nach Ziri, was sie dört mache isch uns Scheissegal

Wenn mir uns alli – kli zämme nämme – denn hän mir's z' Basel scheen
Mir saage jetz – «Sali zämme» – will mir zwei witter geen

Wottsch au by uns bänggle?

Uff www.vsg-basel.ch erfahrsch meh!

Drugg: Amerbach'sche Druckerei, Muttenz

